


ESTD : OCTOBER, 1994
THLA TIN CHHUAK CHANCHINBU

May 2013

Kristian Naupang



Dr. Ida Scudder

- Pathian mi ropui - Dr. Ida Scudder
- Pathian chenna • Rulngan (King Cobra)

Kum 18-na

May 2013

Bu 224-na

Editor

Upa C. Lalbiaktluanga

Managing Editors

**Rev. K. Lalpiangthara
Zohmingliana**

Joint Editors

**Upa Bonny Lalrindika
Upa Liansailova
Lalremmawia**

Circulation Manager

Lalfakzuala

K R I S T I A N N A U P A N G

Synod Office

Mission Veng, Aizawl -796001

Phone - 0389-2324590

e-mail:

kristiannaupang@gmail.com

A man pe duh leh a bu la duh
chuan Circulation Manager
hriattir tur a ni.

Kum khat lak man Rs. 50.

Kristian Naupanga thu chhuahte hi Editor ngaih dan a ni vek kher lo

	A chhunga thu awmte	Phek
1.	Editorial	3
2.	Pathian chenna	4
3.	Ṭawngṭai rah chhuah	5
4.	Ramthar veng Aizawl chawhnu naupang inkhawm	6
5.	Pathianin naupang ṭawngṭai a ngaithla	8
6.	Pathian mi ropui - Dr. Ida Scudder	9
7.	Ka naupan lai chanchin - Khawlkungi	14
8.	Nun zirna huang	18
9.	Rulngan - King Cobra	22
10.	Hriatzauna huang	26
11.	Crossword	28
12.	Chei chhuah	29-30
12.	Bible milem	31-34
13.	Ka hmuh ang hmu thei rawh Inside Cover	



Editorial

Pawisa



Pawisa hi a hlu hle mai a. Khawvelah hian Pathian tih lohvah chuan sum hian thil a ti thei ber a, thil zawng zawng hi a ti thei emaw tih tur a ni. Aizawl khawpuiah pheih chuan sum chhe te tal seng lovin ni khat pawh kan awm thei lo. Ei leh bar, silh leh fen, chenna in leh kal velna zawng zawng hi suma lei vek leh a man pek ngai vek a ni.

Hetiang taka pawimawh a nih avang hian sum hi kan duh a, neih teuh theih dan kan ngaihtuah a, ngaih pawimawh berah neih a awl khawp mai. Sum kan hmuh theihna tur a nih dawn phawt chuan tlawm leh zah pawh kan dawn meuh lo em maw tih theih a ni.

Mi dangte chanchin hriat kan tum pawhin kan rilru-a lo lang hmasa fo thin chu, ‘an hausa em?’ tih hi a ni. ‘Sum ngah ngah hmelt̃ha,’ tih te hi a dik thuak thei nia! Heti khawpa pawimawh leh ropui ni si hi kan Bible chuan ‘Tangka sum ngainat hi sual tinreng bul a ni si a,’ (I Tim. 6:10) a ti tlat mai le.

I nu leh i paten i mamawh leina tura an pek che i chheprelh ngai em? Tleirawl thenkhat chu thawhlawm tur an nute kut atanga an dawn ngei pawh an thlengnawi a, a then hmawmsawm lei nan an hmang then hram thin. Lehkhabu man tur pawh thil danga hmang thena, ‘A daih lo,’ tih ching an awm thin nia! Hetiang pawisa tlem te pawh a hmanna tur dik taka hmang thei lova it tlatna hi eirukna (Corruption) intanna chu a ni kan ti thei ang.

Khawvel ram hausa ber USA chuan an pawisa, dollar hmaiah ‘In God We Trust,’ (Pathian kan ring) tih an chhu kuau mai. An thil neih hlu ber chungah Pathian hming an lam a nih chu. Sum it leh duh avanga kan rinawmna, kan dikna, kan felna nam thlúk a nih dawn lai tak hian ‘Pathian ka ring,’ tih hi kan thinlungah ziaq thei ila a va tha dawn em! Mi tu pawh sum chung a an rinawm tlat chuan thil dangah pawh an rinawm nge nge thin.

PATHIAN CHENNA



- Rev. Lalramliana Pachuau
Moderator, Mizoram Synod

In chenna in kha a fai em? In fai tha chu a nuam bik a nia aw. A nih leh in in kha i tifaï thin em? Nge i tihnewk thin? Mi an lo lèn te hian ‘in in chu a fai a, a nuam hle mai’ an ti thin em? In fai leh thianghlim chu a nuam chauh pawh a ni lo va, a hrisel bik em em a ni. In fai leh thianghlim neih i tum theuh ang u aw.

He kan chenna in fai leh thianghlim chu a pawimawh ang bawkin kan taksa fai leh thianghlim hi a pawimawh. Kan hrisel nan te, changkan nan te a pawimawh em em. Chu chauh chu a ni lo va, Pathian thu chuan ‘Pathian chenna in chu in ni tih leh Pathian Thlarau nangmahniah a cheng reng tih in hre lo vem ni? Mi tu pawhin chu in chu an tikhawloh chuan Pathianin anni chu a tikhaw lo ve ang; Pathian chenna in chu a thianghlim si a, chu in chu in ni e,’ a ti a. Kan taksa leh kan rilru hi Pathian chenna in a nih chu. Pathian chenna tlaka kan vawn thianghlim a pawimawh hle mai.

Kan taksa hi Pathian chenna in a ni a; mahse, kan

tithianghlim zo lo fo âwm asin. Kan taksa tithianghlim lo theitu thil tam tak a awm. Mei zuk te, sahdah hmuam te, kuhva ei sen huam reng mai te, tiranga te, gudkha te leh a dang, thil chin tha lo (bad habit) te hian kan taksa hi a tibawlhhlawh thin a; kan hrisel loh phah nasa bawk a ni. Naupan lai atanga heng thil tha lo ti thinte an awm a, a paw em em a ni. Aia upa zawkten lo ching dawklak mah se naupang leh tleirawl thianghlim, mahni taksa vawng fai thin mi nih i tum tlat ang u. Thil tha lo hi chu entawn duh miah loh tur a ni. Zu in te, drugs ei leh inchiu te phei chu a hlauhawm em em a ni. A hun hma, naupang tēja thlanmual

min pantirtu an ni tih hi hriat reng a tha e.

Kan taksa hi Pathian chenna tlakah, a awmna turin i vawng thianghlim zel ang u. Ani chu lei leh vana Lal ropui ber a ni a; kan taksa tlawm takah hian chen a duh hi a mak zawk asin.

“Anmahniah ka awm ang a, ka chenchilh ang;

An Pathian ka ni ang a, anni pawh ka mite an ni ang,”
a ti a nih chu (2 Kor. 6.16).
Pathian chenna tlakin i taksa kha

vawng fai la, tithianghlim thin rawh le. Tichuan, ani pawhin a chawimawi ang che. Lehkha thiam theihna te a pe ang che a, rilru tha, thianghlim leh hlutak chu a pe ang che. I lo puitlin thlengin a rawngbawltu tha leh rinawm i lo ni thei dawn a ni. Kan taksa hian Pathian chawimawi turin min duh baw (1 Kor. 6.29). Chuvangin, kan taksa ngei hian Pathian duh zawng ti thin ila, a rawng i bawl thin ang u. Kan taksa ngei hi Pathian chawimawi nan hlan fo ila, a rawng i bawl zel ang u.



ṬAWNGṬAINA RAH CHHUAH

*Lalnunhlui (Mami) Cl - VI,
Kum 11, Kolasib Hmar Veng*

Zuali chu hmeichhe naupang fel tak a ni a, u hmeichhe pahnih a nei nghe nghe a. Kum sawm mi a nihin a nu leh paten an thihsan hlah mai a. An unau zinga upa ber hian a enkawl a. Chhungte belh tur an neih loh avangin mi in an luah ve a. A ute chu chawhmeh (eichawp) zuara ni tin rim taka hna thawk thin an ni a. An harsa ve hle thin. An retheih thin em avangin an mamawh leina pawh an nei thei ngai lo va; mahse, chuti chung chuan Pathian hnena ṭawngṭai hi

an thlahthlam ngai lo a ni. Zuali chu naupang hle mah se, an chhungkaw harsatna chu a hrethiam hle a. A theih ang tawk tawkin a u te chu a pui thin.

An dinhmun chu a harsat em avangin school pawh a lut chhunzawm hlei thei ta lo va. Sunday school-ah te hian kawr chhe tak, hlui tawh tak ha te hian a kal ve thin a, mite hian an nuihzat hle hian a hre thin a. Mahse, an unau chuan ni tin bang lovin an tawngtai a, an retheih avanga vui mai lovin Pathian hnenah lawm thu te an sawi fo thin.

Pathinin an tawngtaina chu a hre reng a, an kut hnathawh

te mal a sawm a, an thlai thar leh an thil zawrh reng rengah chuan an lo hmuingil ta em em mai a. Thil eng pawh ti se an thawhrim ang zelin Pathinin mal a sawm tlat zel a ni. Tichuan, an khawsak a lo ziaawm zel a. Zuali pawh chu school te kal tha leh in lehkhate a lo zir leh thei ta a. Inte an sa ve a, in nuam takah chhungkaw hlim takin an khawsa a, Pathian hnenah lawm thu sawiin an tawngtai fo thin a. An retheih laia hmusit leh nuihzat ru thintute khan mak an ti em em a. Mahse, Zuali te chhungkua chuan Pathian malsawmna an dawn avangin lawm thu an sawi fo a ni.



RAMTHAR VENG AIZAWL. CHAWHNU NAUPANG INKHAWM

Ramthar veng, Aizawl-ah hian chawhnu naupang inkhawm tha tak neih ve thin a ni a, a tlangpuiin naupang chawhnu inkhawm hi mi 260 vel an ni a. Hei hi Junior department hnuai lam zawng an ni. Chawhma lam inkhawmah hian Junior deptt. hnuai lam zawng hmingziak hi mi 406 an ni a. Chawhnu inkhawm hi chawhma angin hmingte lam ziah thin a ni a, heti chung hian chawhma lama inkhawm thin za zelah mi 64 inkhawm thin ang an ni. In kohhran nen lo buk chhin la, eng zat percent nge chawhnu

lama inkhawm thin che u. Naupangte theihna chi hrang hrang hmangin solo, recitation, musical drama, group zai te leh Bible chhiar tea hun hman thin a ni. A chang chuan naupangte outdoor games hmanga inelna hrang hrang nei hpui thin an ni a. Kohhran inkhawmah a tam thei ang ber hla rempui thin an ni baw. Tin, tunhnaiah music video te an siam thei a, an lawm hle. Zirtirtuten thei tawp chhuahin naupangte thanlenna tur thlarau lam nun leh tisa lam nun an veiin an ngaihtuah niin a lang.

Chawhnu naupang inkhawm bakah hian tleirawl pual inkhawm tha tak an nei thei reng baw a. Tleirawl pual inkhawm hi a hming atan Youth For Christ, (YFC) an ti a, kum 1999-a din a ni. Hemi Group-ah hian Intermediate deptt. atanga senior deptt. thleng awmin puitling lama inkhawm tawh pawh member-ah hian inziak lut an awm nual baw. He YFC hian chawhnu tleirawl pual inkhawmah mawh a phur a, naupang lam Sunday School zirtirtu mi 22 velin mawhphurhna lain an buaipui thin a. Heng mawhphurtu bikte hi Kohhran Committee-in Sunday School committee

kaltlangin a ruat thin a ni. YFC hian activities tha tak tak – sports, re-union, summer camp, awareness campaign, outreach programme, advance Christmas te leh YFC Nite te a buatsaih thin.

Kum 2013 hian Committee pali siam a ni a, chungte chu - Music committee, Worship dance committee, Drama committee leh Documentation committee te a ni a, heng committee hrang hrangah te hian committee member atan YFC member te an ruat a, special item tha tak tak heng committee kaltlang hian an nei thin a ni.

February thla chung khan paper hrang hrang ruihhlo chungchang te, ngaihzawng nei leh sex chungchang leh career guidance chungchangte an zir ho a, member-ten an hlawkpui hle a ni. Tin, kohhran special programme-ah leh kohhran inkhawmahte hla an rem thin a. Ramthar Tlangveng indang tur inthlah nan Farewell Nite te an hman baw.

Tun dinhmunah hian Kristian Naupang Chanchinbu hi copies 398 lain kohhran malah leh kan sem chhuahnaah chuan an la tam ber a ni.

PATHIANIN NAUPANG ṬAWNGṬAI A NGAITHLA

(Hei hi thil thleng tak tak a ni)

Upa C. Malsawmkima

Zotlang, Aizawl

Kum 4 mi vel lek hmeichhe naupang Mary Lalremruati hi a nu leh pate nen Aizawl veng pakhatan an chhungte in hnuai luahin an khawsa a. Kum 1995 khan tuk khat chu an in luah neitute fa, a rualpui mipa naupang nen in luah chungchangah an inhnial a. An in luah neitu in chung nau chuan, “Kan in in luah,” a ti a. Anin an luah lai chu anmahni in ngeiah ngaiin, “A ni lo, keimahni in asin,” tiin an inhnial thinrim ta a. Mary chu thinrim teuhin a tlan haw ta a. A nu, ina lo awm hnenah chuan, “Ka nu, kan awmna hi keimahni in a ni tiraw,” a ti a. A nu chuan, “Ni e, luah man kan pek chhung chu keimahni in a ni alawm,” tiin a lo chhang ve mai a. Mary chuan a nu sawi hmang atang chuan an in a ni lo tih a hre thiam ta mai a. Rilru na tak chungin pindanah a lut ta a. Chutia rilru nat hmel taka a lut chu a nu chuan ngaih ṭha lo deuh chungin a en thla zui a. Mary te chuan an khum bul tukverh chu hawngin khumah chuan a thingthi a, “*I su, in kan nei lo, in min pe rawh, a bang phiar ni lo,*” tiin lungchhe takin a ṭawngṭai ta reuh a (A bang phiar ni lo a tih hi an luah lai chu a bang dâp tah a nih vang niin a lang). A nu lo en thla rengtu chuan mak a ti hle nghe nghe a ni.

A nu leh pa te hi sawrkar hna thawk ve ve an ni a. In sakna tura sawrkarin a hna thawkte a pek chhuah ṭhin House Building Advance (HBA) hi an lo dil fo tawh ṭhin na a, an la dil hmu ngai lo va. Hetia Mary a ṭawngṭai hnu rei vak loah hian a nu leh pa te chuan HBA chu an hmu ve ve

ta a. In hmun lei tur an han dap a, mahse, rinaiin lei mai tur ṭha a vang khawp mai. Mary pawh chuan a nghakhlal a, a ṭawngṭaina chu Pathianin a chhang har tawh te pawhin a hre hman rum rum a. Nakinah chuan in hmun an duhthusam, kawngpui àn, lei ena an en phak loh, a neitupa pawhin

man tha tawk taka lei tumtute mi tam tak a lo hnar tawh chu a neitupa ngei chu an inahrawn len chilhin leisak turin arawn nawr zawk ta mai a. Tuk hnih khatah Rs. 1,45,000 lekin an inlei fel ta der mai a ni. An lei fel hnu chuan phur takin thingzai te leiin an inbuatsaih chho ta a. Mahse, an mistiri rawih tum chuan an thingzai hman tur inhnuai a an dah that chu a'n enchiang a, hman tlak awm mang lo khawpin a lo mawih chhe vek mai a. Chutia Assam Type in sakna tur ber thing a mawih chhiat si chuan Cement concrete in sak

mai a rawt ta a. A tira an tum dan chu ni lo mah se concrete building in chu an rel ta chawt mai a ni. Sum chu nei sa em em lo mah se Pathian tanpuina azarah an sa zo ve ta mai a.


Hmeichhe naupang kum 4 mi Mary Lalremruatin a bang dâp ni lo, lung chhe tak chung a dil chu a tawngtâina chatuan Lalber, Lal Isua chuan a lo hre reng a, a bang dap ni lo, tunlaia kan bang neih that ber concrete bang Pathianin a pe ta zawk a ni. Concrete building, anmahni ta ngeiah an cheng ve ta reng mai a ni.



PATHIAN MI ROPUI Dr. IDA SCUDDER (1870-1960)

*Upa Dr. C. Zarzoliana
Ramhlun Vengchung*

USA atanga missionary doctor hna thawka India chhim lama rawn awm, Dr. John Scudder Jr. leh Sophia-i te chuan kum 1870 December ni 9 khan fanu duhawm tak mai an nei a, a



hmingah Ida Scudder-i an sa a. A lo thang lian zel a, India ram Medical College leh Hospital lar tak, Mizote pawhin kan pan huai huai, Christian Medical College (CMC) Vellore, din chhuaktu a lo ni ta a ni.

Ida-i pu hi USA atanga India rama missionary doctor hna thawk tura lo kal hmasa ber a ni a, kum 1819 khan a rawn thawk tan daih tawh a ni. Ida-i nu leh pate hian Ida-in kum 13 a lo tlin chuan School tha leh changkang zawka a zir theih nan tiin India rama an rawngbawlna hmuna awmtir lovin USA-a an chhungte bulah an dah a ni. A khua a harin a lung pawh a leng thei em em a ni awm e. Kum 7 vel lehkha zira a awm hnan hnuah, kum 1890 khan a nu a dam loh avangin enkawl tur leh a pa pui turin, a zirlai pawh zir zo hman lovin India ramah a lo let ta mai a ni. Lehkha a zir zawh hnuah pasal te neiin USA-a chen zui Ida-i chuan a tum rilru hle a. A nu leh pate anga India rama missionary hna thawh chu a tum lo hle a ni awm e. Mahse, a rilru tihdanglamin a lo awm ta phut mai a ni.

Zan khat chu pa pathum hian an nupuite nau nei tur nau vei na tuar enkawla tanpui turin Ida-i chu an ngen chiam mai a. Mahse, damdawi leh damlo enkawl lam thiamna eng mah a nei si lo va, tih ngaihna a hre lo hle mai. A pa missionary doctor kawhmmuhin kohsak zawk mai a tum a. Mahse, an zinga pakhat chuan, “Ka nupui nau nei lai hi mi dangin an enkawl ai chuan a thih zawk mai a tha,” a ti ta tlat mai a. Khang hun laia India rama Muslim leh Hindu hmeichhiate tan khan mipa doctor inentir ngawt a rem lo a ni awm e. Chutia enkawltu tur hmeichhia an awm tak lovah chuan nau vei mek te chu hemi zan hian an thi ta vek mai a ni. He thil thleng a hmuh hian Ida-i chuan India rama hmeichhia, doctor leh damdawi lam thiam an mamawhzia a lo hre ta a, Pathian kohnaah ngaiin, a nu leh pate bulah chuan, “America rama kalin doctor ni turin ka zir leh ang a; tichuan, India hmeichhiate tanpui turin ka lo kir leh dawn a ni,” a ti ta tlat mai a ni.

Kum 25 laia upa a nih tawh hnua, 1895 khan Ida-i chu Hmeichhe Medical College, Philadelphia-ah doctor zir turin a lut ve ta a. Doctor a zir kum hnunung berah chuan Cornell University hnuaia Weill Medical College-ah insawnin 1899-ah a zir chhuak ve ta a ni.

India ramah a pa kaihhraina hnuaiah a thiamna te a taka hmang turin a lo kir thuai a. Hetih lai hian a pa khan tuihri venna damdawi thar siam chhuakin a hmang chhin vel mek a ni. Ida-i pa Dr. John-a chu kum 1900 khan a thi ta mai si a. Ida-i chuan Hmeichhe damlo enkawl na tur, khum pakhat chauh awm, Vellore (Tamil Nadu State)-ah hemi kum hian a siam a. A pa a thih takah chuan damlo enkawl tur a ngah thei hle mai. Hmeichhia a nih avangin a tirah chuan mite rin a hlauh lo hle mai a, an inentir tha duh meuh lo a ni awm e. Mahse, hmangaihna nen uluk takin damlote a enkawl thin a, mite rin pawh a hlauh ve ta hle mai.

Mi hausa tak pakhat Pu Schell-a hian a nupui thi tawh hriat rengna atan Ida-i

rawngbawl na pual hian dollar sing khat lai a thawh a. He pawisa hmanga bulthanin Mary Taber Schell memorial Hospital chu kum 1902 September thla khan a din ta a ni. Ward hnihah thenin a vaiin khum 40 lai a awm a. Ward pakhat zawk chu damlo rethei zualte man lova enkawl na atan dah bik a ni a. Ward pakhat dang erawh chu tlema khawsa thei deuh damdawi in awm man pe thei te damdawi in a ni. Amah puitu awm chhun Salom-i, India mi nen chuan damlo enkawl tur an tam si a, an hah thei em em mai a ni. A kum khatna maijah pawh mi 21 lai zaipui (major operation) a zai an ni a. Mi 28 vel zai tenau deuh (minor operation)-a zai an ni bawk a, dam lo 12,359 lai a enkawl hman a ni.

Vanneithlak tak maiin Ida-i chuan a hnathawhnaa tangkai tak tur thilpek ropui tak a dawng hlauh mai a, chu chu motor car a ni. He car hmang hian hmun hrang hrang tlawhin kawng dungahte inentirna hmun a hawng zel a, hetiang hian Nilaini apiangin a thawk

chhuakin, thingtlang khua 50 vel lai tlawh kual thin a nei a ni. Damlo chi hrang hrang anrawn inentir thin a, a chang chuan kawng laklawhah te pawh an lo tiding a, dam lo enkawl ngai amah mamawhtute chu a enkawl zui nghal zel mai a ni. Damlote hi hmangaihna leh tawngtaina nen uluk taka a enkawl thin avangin miten an ngaisang em em thin a ni.

India chhim lam mite, a bikin hmeichhiate an lo hrisel zawk theih nana amah maia thawh chu a theih loh tih a hre chiang ta a, chak zawka a thil tum a hlawhtlin theih nan hmeichhe tan bik Nurse zirna School din tulin a hria a. Chawlh hmanga an ram lama a zin leh chuan Nursing School dinna tur sum neih dan tur a zawng nasa hle mai a. Kum 1918 khan a din thei ta mai reng a ni. Hetia damlo enkawla a buai em em karah hian Thawhlehi apiangin Bible zir hona class a neihpui thin a ni an ti.

Ida-i te kohhran, Reformed Church in America chu Nursing School atana pawisa thawhtu ber a ni thin a. Mipa tan pawha

zir theiha siam a nih takah chuan Mission pawl hrang hrang 40 laiin tanpuina an pe ta thin a ni. Kum 1942 atang pheih chuan Doctor (MBBS) zir theihna atan hlankai a ni ta hial a ni. A hming pawh Christian Medical College tia thlak a ni zui ta bawk a ni.

Kum 1900-a India chhim lama Hindu leh Muslim hmeichhiate puala khum pakhat chauh awma bul tan damlo enkawl na hmun chu tunah chuan damdawi in ropui tak, khawvela Christian Hospital lian ber, khum 2000 aia tam leh thawktu tam em em awmna a lo ni ta reng mai. India ram pawn atang pawhin damlo eng emaw zatin an pan reng bawk a ni. Damdawi ina thawkte an felin mi an enkawl thatzia hi an sawi nasa thin hle. Damdawi lam thiam zirna School tereuh te ni thin chu tun dinhmunah chuan India rama Medical College hmingthang leh tha ber ber pathum chauh pawh thlang dawn ila CMC Vellore hi a tel ngei ang.

Dr. Ida-i hnathawh leh Pathian tana a inpekna hi a ropui em avangin kum 1952 chhunga khawvela hmeichhe

doctor ropui bik panga thlan chhuah chawimawina an pek zingah pawh a tel nghe nghe a ni. A lar em avangin **‘Dr. Ida, India’** ti ringawta a address ziaka lehkhaw thawn pawhin a hnen a thleng em em tho a ni an ti.

May 24, 1960 khan kum 90 a nihin Kodaikanal-a a chenna hmun, India ram ngeiah a thi ta a ni. Sap rama pasal leh fate neia nuam taka cheng thei tur Ida-in Pathian kohna chhanga India mite, a bik takin India chhim lam hmeichhia te

hriselna atana nasa taka a thawk hi a ropui hle mai. Pasal leh fa pawh a nei ta lo reng reng a. Thih thlenga Pathian rawngbawla India rama thawh a thlang ta zawk a ni.

Pathian kohna chhang duh lovin USA lamah khan awm ta se, Ida-i kha damdawi in leh College ropui tak dintu a ni hauh lo vang a, mite ngaihsan leh tun thleng pawha hriat hlawh a ni hek lo vang. Pathian hian ama tana inpe te chu a chawimawi ve thung thin tih Ida-i chanchin atang hian a lang Chiang hle a ni.



Thinrin tawngkama thil i sawi hmain tu emaw tawng ve thei hauh lo a awm tih ngaihtuah ang che. I chaw tui lohzia i sawisel hmain, tu emaw ei tur eng mah nei lo an awm tih ngaihtuah hmasa phawt ang che.

(Facebook HAN DAWN VE TEH)

KA NAUPAN LAI CHANCHIN

Padma Shri Khawlkungi

*‘Vaivut ata rethei chu a kaitho thin a, Pachhia chu ekdir
ata a chawi kang thin. Mi lian te hnena a awmtir theiha, Ropuina
lalthutthleng an chan theih nan,’ 1 Sam 2:8*

Kum 1927, Sept. ni 14 (Nilaini)-ah Mission Vengthlang, Tlangvengah ka piang a. Chung hun lai chuan Tlangvengah hian in 7 chauh kan awm a. Kum thum ka tling tep, ka chhang a la piang lo tihin, ka nu leh pain ka pi leh pu te buh seng ramriahnaah min kalpui a, chuta bawng leh lawi luh theih loh nana dai kawngkhar kan kal lai chu ka hre thei a, ka hriat theih hla ber a ni.

Nungchang lamah zakzum lutuk ka ni a. Sunday School te, ni tin School te ka kal ngam har hle a ni. Sunday School hi tuna New Street hnuai Bookroom hluiah Beginner kan kal a, milem nalh tak tak Zosapten min sem thin a. Ni tin school lam aiin ka kal ngam hmasa deuh a. Kan veng hi Mission Compound huam chhung a ni a. Mission Sap thu te, Sunday School-a kan zir reng reng te hi a bu ang thlapa zawm tum tlat kan ni. Mahni tawkah Bible chang pawh kan hre hnehin kan byeheart thei zel a ni. Mi zakzum, dawihzep tak

mai, thiante sual ngai lo ka ni a. Keimah aia te leh huai zawk te chhan fo ngai ka ni bawk.

Sunday School lamah ni tin school aiin ka lut hmasa a, Bible chang ka byeheart tam hle a. Naupang inkhawmpui ah chang insawisiakah min telh ziah a, zak lutuk, tap teuh chungin ka sawi ve ziah a, lawmman pakhatna ka dawng ziah bawk. Sunday School exam-ah Full mark ka hmu ziah a. Junior dept.-ah ka awm tirhin kum 8 ka pel tawh a. Hotuten Sunday School Secretary-ah min ruat ta a, ka zak ngawih ngawih a,

Secretary thawk lai tlangvalho chuan, “I hna rawn zawm tawh rawh le,” an ti a. Ka thutna atangin ka tho chhuak ngam tawh lo va, ka zak lutuk a, ka tap tep mai thin a ni. Min ti lui duh ta lo va, Secretary hna chu ka thawk lo hlen ta a ni.

Kan Zosap hmeichhia te khan Sunday School lamah pawh tan an la nasa hle a, intihsiakna hrang hrang kan nei fo va, recitation te, Bible thu hriat lamah te lawmman tha tak tak an siam a, ka dawng fo thin. Kum 14 ka nih dawn kumin Pi Zaii (Miss Ketherine Hughes) khan Beginner zirlaibu tur, Sap tawnga mi min lehlintir a, translation work ka thawh hmasak ber a ni a, min fak ve hle a. Primary zirtirtuah min dah nghal ta a; mahse, ka pawlte mipa naupang an ni a, a then chu ka ngam loh te an ni a, zirtir an buaithlak hle, kan la naupang ve a, min hlau hauh si lo.

Ni tin School lamah hian ka kal ngam har hle a. School ka kal ngam si lo va, ka zak ngawih ngawih a. Thianten ka

thi awrh mawi an ti a, an han en laih laih te hian ka zak lutuk a, ka men lawih lawih a, ka tap vak zel mai a ni. Chung hun laia Hmeichhe Primary School chu tuna Synod Press awmna lai hi a ni a, a piah lawk, a zawn pheiah Loch Printing Press a awm a, ka pa H. Chhuma hi Press-a thawk hmasate zinga mi a ni a, ka pa hnathawhna bul hnai a nih avangin kum 8 ka nihin Primary-ah ‘A’ pawlah ka lut ve a. In lamah A A W B te chu ka thiam vek tawh a. Kum chanveah B pawl min kaitir a, Arpui sen te hi kan zir deuh ber a ni mai, ka thiam hneh ve hle thin.

A kum leh kum 9 ka nihin pawl khat ka kai a, 1st term-ah subject zawng zawngah full mark ka hmu a, kum chanveah pawl 2-ah min sawn a. Ka pa chuan min huphurhpui hle a; mahse, kum tawp exam-ah 1-na ka ni leh ta a. Mahse, hand work (Puan thui)-ah full mark ka hmu ta lo. Pi Meni (Pu E.L. Mendus nupui) kha puan thui thiam tak mai a ni a. Pawl 2-

ah chuan exam-naah kawrkilh kaw thui kan nei a. Pawl 2-a kan zirtirtu Pi Rochhungi hnenah Pi Meni chuan “I School naupang Khawlkungi hi subject zawng zawngah full mark a hmu si a, engati nge puan thuih a va tichhe em em ve le,” a lo ti a ni. A dik hle a, puan thui lam hi ka thiam lo hle a ni. Kum 10 ka nih kum 1937-ah Lower Primary ka exam ve ta a. Mizoramah pakhatna niin scholarship thla tin Rs. 3 ka la ve a. Mipa school puiah Head Master office-ah thla tin scholarship ka han la thin a. New Street chhuk hi ramhnuai ngaw dur khup a la ni a, kawng ruh chu a awm riak chauh a ni; mahse, kan kal ngam ngai lo. Pi Zaii bangla tlang lamah kan chho va, Sikulpuikawnah kan phei thin. Tuna hmeichhe sikul hi sak lai mek a ni a, kum 1940, kum chanve velah kan luah chauh a ni.

Ka zirnaah ka tluang chho zel a, pawl 4, pawl 5, pawl 6-ah te pawh kan pawlah pakhatna ka ni chho zel a, pawl 6 kan nih kum 1940 a ni

a, kum 13 ka ni chho mek a, kan Headmistress chu Pi Zaii a ni. Pi Zaii chuan, “Sap nula fel tak mai, lehkhathiam hmeichhe school zirtirtu ni turin Mizoramah a lo chhuak dawn a. Sap tawngin lehkhathawn ziaik theuh ula, kan school chanchin te hrih ula, a ziaik thiam ber ziaik kan thawn ang,” a ti a. Kan ziaik ta sap sap a, ka ziaik chu a thlang ta a. Sap ramah Pi Zaii chuan a zuk thawn ta a. Chumi kan lehkhathawn chu Miss Gween Rees Roberts (Pi Teii) kha a ni. Ka lehkhathawn pawh minrawn chhang nghe nghe. Mahse, Indopui II-na kha Europe-ah chuan Sept. ni 3, 1939 (Pathianni)-a intan tawh a ni a. Pi Teii kha a lo kal lawk thei ta lo va, Mizoram a lo kal chuan keini chu Air Force Clerk hnathawkin phai lamah kan awm daih tawh a, School tinah min lo zawng a ni awm e. Kum 1946-ah kan inhmu ve chauh a ni.

In chhung khawsak lamah hian kan harsa ngai lo va, mahse ka nu laizawn pasal a

boral a, a fate pathum nen ka pa enkawl an ngai ta a. Ei leh bar harsatna kan tawk ve ta a ni. Hemi kawngah hian ka nu leh ka pa an fakawm ka ti hle a, hrin hrang chhungkaw hnih min lo enkawl seilian thei a, eng mah harsatna tawk lova kan vaia min enkawl puitling vek thei hi an chungah ka lawm tak zet a ni.

Ka naupan tet atanga tun thlenga ka nun chhoh zel dan ka ngaihtuah hian, ka awm dan tur te, ka nihna tur te, engkim mai hi Pathianin min lo ruat lawksak diam niin ka hria. Kan School kai ve laiin Mizoramah High School kan la nei lo va.

Ka lehkhah zir chhung zawngin pawl 1-6 thlengin pakhatna ka ni chho zel a. Kum 1940-ah Middle Scholarship Exam kan nei a. Ka thian kawmte chu pawl 5 an ni a, an exam zo tawh a, chung hun laia kan thil tih chak ber chu thing phurh leh thing eh phel pheh a ni. Ka naupan zual lai chuan inkawibah hi nuam ka ti a, ka thiam bawh a, hlah miah lovin bu ka let thei thin.

Pawl 6 exam dawn chuan ka nuin, “I thiantie exam zo tawhten thingphurhpuih an rawn sawm che pawhin kal suh, lehkhah lo zir ang che,” a ti a. Min rawn sawm ta ngei a, a rukin em, chem leh hreipui ka la chhuak a, ka kal lui ta ngei a. Thing kan han kit chu, ka kut ding lam zungchal ka sat ta a, a bung lo chauh a ni. Ka thianten tlangsam an sawr a, puanchhiain an tuam a, ka nute kan hrilh ngam si lo. Ka kut hliah chu a septic ta a, kut vei lam ka hmang thiam si lo. Na ka ti lutuk a, then tlawk tlawk chungin ka exam zo ve hram a. Pakhatna ka ni phak ta lo, ka ni teuh viau chauh a ni. Scholarship chu tunhmaa min tluk ngai lo khan a la ta a. Nu te thuawih loh man ka tuar ta a. High School pawh ka lut thei ta lo va. Mahse, heng zawng zawng hi ka ngaihtuah let leh hian, Literature lama ka kawng zawh tur - Pathianin a lo ruahman lawk vek niin ka hria a ni.

Kum 1987-ah India chawimawina sang Padma Shri ka dawng a. 1998-ah

Mizo Academy of Letters chawimawina sang ber Academy Award ka dawng leh a. Hemi kum vek hian State chawimawina sang ber Girl Guide Movement-ah Medal of Merit ka dawng bawk. Ka naupan lai atanga

Pathian min kaihhruina hi a ropui tak zet a ni.

(Pi Khawlkungin kan sawmna ngai pawimawhin a naupan lai chanchin ngaihnawm tak minrawn ziahsak a, kan lawm hle. Editor)

NUN ZIRNA HUANG

Upa Bonny Lalrindika

Heavyweight Boxing khawvela a hming hre lo awm theih lohva ngaih, heavyweight boxing chanchina champion naupang ber nihna record la chelh mek zeltu Mike Tyson kan hriat hlawn a rinawm. Brooklyn, New York City khaw chhuak a ni. A unaupa a pianpui Rodney nen chuan mi inang lo lutuk an ni a, Tyson aiin Rodney chu kum ngain a upa zawk a.

Tyson-a pa Jimmy Kirkpatrick khu Grier Town, North Carolina khaw mi a ni a, nun uluk lo ve tak niin nupui pawh a nei nual mai. A pa Jimmy Kirkpatrick hian kum 1966 khan a chhuahsan a,



Brooklyn lamah a awmsan a. Hemi kum hi Tyson-a pian kum a ni. A pa bulah awmin a pa chu pool khelin a leng bo reng a, pawisa a khel reng baw k a, a in pui ber chu khawlai a ni.

Tyson hi a pian lain a pain a rawl bosan tak avangin pa enkawl na dawng lovin a lo seilian a, a pa chu a hria a, mahse, entawn tur a neih chhun chu a khawlai nun chauh a ni. Tyson-a nu Lorna Smith Tyson chuan Tyson te unau chu a theih ang angin a enkawl chho ve ta a. A pa Kirkpatrick chu kum 1992 khan a thi a ni.

A nu hovin Bedford-Stuyvesant-ah an awm a, an retheih tual tual avangin Brownsville lamah Tyson kum 10 a nihin an insawn leh a, chumi hnu kum ruknaah a nuin a thihsan leh a ni. A nuin a thihsan lai hian Tyson hi kum 16 mi a ni a, a nu hian boxing manager leh trainer Cus D'Amato kutah a dah fel hman chiah a ni. Cus D'Amato chu a pa a ni ta ber mai.

An in chhungah hlim thawm a awm ngai lo tih theih a ni a, Tyson ngei pawhin chu chu a

sawi a, “Ka nu hlim hmel hi ka hmu ngai lo. Ka chung a lawm ngai pawh ka hre lo. Ka thiltih a lawm pawh ka hre ngai hek lo. Khawlai mi ka ni a, mi sual leh awmmawh ka ni tih min hriat chianna chauh hi ka hria. Thawmhnaw thar ka hawn thin a, ka lei a ni lo tih a hre thin baw k. Rukruka inthuan mawi thin ka ni a, ka nun chu chutah chuan a intan a ni,” a ti.

A naupan lai hun zawng zawngah khan Tyson hian nun zirna tha a nei lo va, sual tinreng tlangnelna hmunah awmin an thenawmte reng reng pawh pawisak nei tlem tak vek an ni. Chu chuan a nun chu nasa takin a hruai khaw lo ta a, vawiin thlenga a chanchin kan hriat tawhah chuan Tyson hian chanchin mawi a nei tlem em em a nih hi.

Insual turin a rilru a fit em em a, nunphung pangngaia nung tur erawh chuan eng lai mahin a fit thei lo. Cus D'Amato hian nun siam thatna school-ah a dah a; mahse, a hlawhchham thak a ni. D'Amato pawhin a enkawl peih lo va, mi dang dang kutah a tal kual vel ta a ni. Heng thilte avang

hian Mike Tyson hian nun dan dik a nei ta lo va, chu chu vawiin thlenga a tal buaina hi a ni ta a ni.

Tichuan, kum tam tak chhûng boxing khawvelah ropuiin a leng vel a, professional boxing a chawlhsan kum 2006 khan boxing a tângin US dollar maktaduai 300 chuang zet a hlawh chhuak tawh a ni. A boxing style ropui tak avangin han mawi dawn viau thin mah sela, a nun tlabal lutuk mai avang bawh hian a tluchhe leh thin. Ring chhung leh pawna a nun chu mualphonain a tuam reng a ni.

Leilung pian tih ata vawiin thlenga Boxing Ring chhunga che ropui ber 100 thlan chhuahah 16-na hial ni mah sela, ESPN.com list-ah phei chuan No.1 hial ni phak bawkin International Boxing Hall of Fame leh World Boxing Hall of Fame-ah te lawm luh niin ropuina tin reng bel mawlh mawlh mah sela, vawiinah hian Tyson hian amah an châk tu mah a la siam lo a ni.

Aw le, kan chanchin bu hmel thar a lo lang a, tleirawlte leh naupangte tan thil tângkai chhiar tur a tam sawt dawn a. Kan huang thar tur pakhat chu **NUN**

ZIRNA huang hi a ni dawn. Helai hmunah hian i ni tin nun hruaina tur pawimawh i chhiar thin dawn a ni. A chung a mi ropui tak chanchin kan tar lan tawi te khi ngun takin chhiar la, mihring hian nun dan thiamna a neih phawt loh chuan eng mah a chhawr tângkai lo va, mawi nan a hman thei bawh hek lo tih i hria ang.

Boxing talent chu hausakpui tham a nei a, mahse dollar maktaduai 300 chuang zet mai, hman ral mai sen rual loh khawpa tam a chum chhuah tawhte khi Tyson-a hian a nei tawh lo va, tunah chuan sum lamah harsatna tawkin leiba angah bawh sia, a nupui then tak Robin Givens hnena zangnadawmna kum tin a pek thin tur pawh hi a zo meuh tawh lo a ni. Lallukhum ropui tam tak hlawh chhuak mah sela, khawvela mi khawlo ber zingami a ni.

Changkanna kawng chu i changkan phah a, hausak theihna thil chu i hausakpui a, hlimpui theih thil chu i nunah hlimawm tak a nih theihna turin a thil leh hmanraw lam ni lovin, a dawngsawngtu tur leh a hmanngu tur nun kha i siam dik

hmasak phawt loh chuan thil hian a letling zawngin an thawk vek mai zel dawn. Chuvangin, i ropuina ber tur i NUN kha uluk takin en chiang ang che.

Min siamtu Pathian hian mihring hi a thil neih hmanga ropui turin a ruat lo va, a dinhmun avanga ropui tur

pawhin a ruat lo va, a ropuina sang ber atâna a pék chu NUN hi a ni. Hetah hian i ropui theih hma chuan eng mahin a chawi kang thei lo vang che. Tichuan, NUN ZIRNA HUANG hi thla tinin ngun takin lo chhiar la, Pathianin a ruat ang taka nung thiam, mi hlawhtling i ni dawn nia.



1. *Sava a intam hleih.*
2. *Dawhkana thil awm a inang lo.*
3. *Uite a awm ve lo.*



4. *Hmeichhe thil phurh a inang lo.*
5. *Street light chhip a inang lo.*
6. *Thirsakawr ke a inang lo.*

RULNGAN - KING COBRA



Lalzara Cls. X
s/o Lalhruaitluanga Ralte
Mission Veng

Rulngan hi Mizoten hmanlai atanga kan tih leh hlauh a ni a, India ram pumah pawh ramsa hlauhawm ber pawl a ni. Tûr chak tak a nei a, a tlang chak em em bawkw.

Thingkungah a lăwn thei a, tuiah a chêng thei bawkw. Vawi khat chuka a tur tihchhuah hian mi 20 vel a tihlum thei a, mi tam tak a chuk hlum tawh bawkw a ni. Tunah hian Rulngan (King Cobra), khawvela rul hlauhawm berte zinga mi chanchin han sawi ka tum dawn a ni.

Rulngan hi a scientific hming chu *ophiophagus hannah* tih a ni a, he rul hi khawvela rul tûr nei zinga sei ber a ni. Cobra tih hming hi pu mah se *Naja* genus, chawngkawr kan tihho, cobra chi hrang hrang nen an class a inang lo va, genus hran nei a ni. A tlangpuiin rul dang, a bik takin rat snake (sazu leh thil dang ei chiho rul) hi a chaw a ni a, mahse, sazu te, uṭawkw te leh zăwng te pawh a ei ve ṭhin tho a ni.

Rul zingah hian a note hring chi leh a tui awp keu chi an awm

a, chung rul chi hrang hrang zinga zaa sawmsarihte chu tui awp keu chi an ni. Rûlŋan pawh hi chutianga awp keu chi chu a ni. Asia khawmualpui chhim lam leh chhimchhakah te, China ram chhim lamte hi a awm tamna a ni. Tlangrama ramngaw chhah pui puiah te a awm tlangpui a, dil leh lui awmna lai velah hian a awm duh leh zual.

Rûlŋan hi a tlangpuiin fit 10 emaw, chu aia seite pawh a ni ṭhin a, kg. 6 vela rit an ni tlangpui. An hmuh sei ber berte chu fit 18 leh a chanve laia sei te a ni.

A vun rawng hi a dum te, a hring nghal te leh a buang uk lam te a ni a, a dung zawngin a taksaah hian rawng engin a inrin thin. A dul hi a rawng eng emaw, rawng var eng lam deuh a ni tlangpui a, a vun hi a mām tle zar a ni. A lu hi a lian hle. A note chu an dum tle var a, a taksa dung tluana rawng engin a inrin pawh a la sin hle a, an tlang lian a, heng inrin hi a lian ve telh telh thin. Rul chi khat banded krait nen an hriat pawlh fo va, a awr a tihphek aṭangin hriat hran a awlsam hle.

Rûlngan hi monotypic genus an tih ang chi, anpui nei lova mahni chauhva awm a ni. A genus chu *ophiophagus* an ti a, elapidae chhungkuua mi a ni. Cobra dang erawh chu *naja* genus-ah an awm hlawm. King cobra hi a len bik vang leh a awr tih phek dan a inan loh avangin cobra dang chawngkawr kan tihte lakah hriat hran a awl hle. A lu aṭanga a hnung zang inkar, a tukkhum tial dan hi chevron an tih, V pianhmang anga inziak a ni. Cobra dangte chu a nghawngah chuan mit ang pianhmang pakhat emaw, pahnih emaw a awm thung. King

cobra hriat chian theihna ber chu an lua phuhlip lian tak pahnih awmah hian a ni a, chu chu occipital an ti. Rûlngan zir Chiang Hmasa bertu chu ***Danish naturalist Theodore Edward Cantor-a*** a ni a, kum 1836-ah khan a lo zir chiam tawh a ni.

Rul dang ang bawkin a leiin a chaw a zawng thin a. Beng a nei lo va, a mit erawh hi chuan thil che vel fit 100 aṭanga 300 zeta hla a hmu thei a, mahse eng nge a nih hre hrang khawpin a hmu fiah thei lo a ni. A lei hnathawh dan hi mihring hnâ hnathawh dang deuh hi a ni a, boruaka rim awm hi a leiin a hre zung zung thei. A leia thil rim a hriat chu a ka chhung chung lama awm, Jacobson's organ an tihah chuan a han tat a, he organ hian eng nge a nih a lo chhut chhuak thin. Hetiang hian a thluak chuan ei tur chaw awmna a hre thei a ni.

Tin, a khabe hian leia rannung kal nghawr vel chu a hre thei a, chu chuan ei tur sazu ilo zawn a ti-awlsam em em bawk a ni. A tûr hi neurotoxic venom a ni a, hetiang tûr hian hriatna thazam a khawih a, a tizeng thei. Mihring a chuk hian lung

hnathawh thisen sem kual hna hi a titawp thei a, a tûr thahna hman vat loh chuan mihring a chuk zingah zaa sawmnga emaw, sawmruk emaw chu an thi ngei thin.

A tûr hi chu rul tûr chak chi dang angin a chak lem lo va, nimahsela, tûr ngah tak a ni thung. A wawi khat chuka a tur tihchhuah hian mi 20 lai a tihlum thei a, sai hial pawh a that thei a ni. Amaherawhchu, a chuk nazawngah hian tûr hi a tichhuak kher lo. Rulngân hian a chaw, sazu leh rul te pawh a ei hian rul dang angin a dawlh a, a thial thei lo. Rul zawng zawng hian khabe fân thei tak, elastic jaw an nei vek a, an khabe hnuai lam hi an tikau zau thei em em a, an lu aia let tam taka lian pawh an dawlh thei thin a ni.

Zanah ei tur a zawng ngai lo va, zing leh chhunah chauh a zawng thin. Chuvang chuan, diurnal species an ti a ni. Rulngân hi rul dang aia danglam bikna a neih langsar tak pakhat chu a tui awp keuna tur bu a chhep thin hi a ni. Rul dang eng mahin bu an chhep

ngai lo. A nu hian hnim hnah ro hi a hui khawm a, a lai takah a tui khawm raih thin a ni. Mizovin ***‘rulngan nuin a tui a awp laiin rulngân pain a lo veng a, a vil reng thin’***, an tih hi a dik chiah lo. A pain a khat tawkin a rawn ngaihven chauh thin. A nuin a tui a awp keu tawh hnu chuan a ngaihsak zui ngai lo va, rul note te chu anmahniin an tla hrang ve nghal tawp a, an him lo hle thin, lo eitu an tam avangin.

Hnam thenkhatin rûlngân hi pathian anga an biak laiin thenkhatin an hlau em em bawk a. Thawnthu vela an sawi hlauhawm em vang hian a lâh hle bawk a ni. India ramah chuan rul lamtir thei, snake charmer te hian chawngkawr an hmang uar hle a, phenglawng rimawi ria lam ang mai hian a awm thin a ni. Burma ramah chuan rulngân hi an hmang bawk. Burmese hmeichhia te chuan fa neih tam nan rulngân lu hi an fawp thin a, tunhma chuan an ngai thupui hle a ni. Rulngân hian thil a theihngihl ngai lo an ti bawk thin a, a kawppui an thahsak

chuan a thattu ngei kha a zawng chhuak a, a chuk hlum ve thin titein thawnthuah chuan sawi a awm a ni. Hindu-te tân hian rulngân leh chawngkawr te hian pawimawhna an nei lian hle baw a, thihna leh thawhle hna tilangtu angah an ngai a, a vun a inliha, a tharin a tuam leh thin vang hi a ni ber awm e.

Rulngân hi rul ropui leh tihbaiaawm tak a ni a, pawimawhna chi hrang hrang nei leh ramsa mak leh dangdai tak a ni. Hlauhawm chu a hlauhawm tak meuh a, ngaihthaha tih mai mai chi pawh a ni lo. Nimahsela, ramsa dang ang baw a ni a, he

khawvela thihna leh nunna inher chhuak zelah hian ramsa pawimawh tak a ni ve reng baw a ni. Ram leh hnam tan pawha pawimawh tling a ni a, mihringte tan pawh pawimawhna a nei ve reng a ni. Thah tuma mi chuk mai mai chi a ni lo va, a awm dan phung a ni mai a, mihringte kan fimkhur chuan hlauhawm a ni hauh lo. Chuvang chuan, he ramsa hi zah chung zelin en ila, Pathian thilsiam ropui tak a nih angin humhim i tum theuh ang u.

(Kan sawmna ngai pawimawha Lalzaran' Rulngan chanchin ngaihnawm tak minrawn ziahsak avangin a chungah kan lawm hle a ni. Editor)

Tu thusawi mah ngaih pawimawh nachang hre lo mihring leh mi thusawi ang apiang ngai pawimawh vek mihring te hi, khawvel mihring zawng zawng zinga hlawhchham tlat tura piang mi pahnihte chu an lo ni reng zuk nia.

Lalzuitluanga, Ramhlun 'S'



Hriatzauna Huang

Lalremmawia, Jt. Editor

Mihring taksa, Pathianin vaivut aṭanga a din, a hnara nunna thaw a thawk khum avanga nunna lo nei taah hian timûr leh pêng tam tak a awm a. Zir mite chuan mihring taksa hi chi riatin an ṭhen a. Chung aṭanga hriatna tizau thei thu ngaihnawm tak tak chu hengte hi a ni:

1. Vun chhah zawng hi, a inngahna taksa azirin mm 1/2 aṭanga 6 a ni ṭhin.
2. Lei hian kha, thûr, al leh thlumte a hre hrang thei.
3. Nuih nan tihrawl 14 kan hmang a, thinrim nan tihrawl 43 kan hmang thung.
4. Kan taksaah hian tihrawl 65 vel a awm a. Tihrawl chak ber lai chu khabe ruh vela tihrawl hi a ni.
5. Rilfâng hi cm 750 vela sei a ni.
6. Rilpui hi cm 150 vela sei leh rilfâng lêṭ thuma lian a ni tlangpui.
7. Mi tam ber vun hi kg. 20 vela rit a ni a. Vun inch 1 bialah hian thisen zâm cm 600-a thui a awm.
8. I hahchhiau laia i hnar aṭanga boruak chhuah chak zawng hi darkar khatah km 156 a ni. I hahchhiau hian i taksa peng zawng zawng hnathawh lai a chawl vek, i lung phu chenin!
9. Kan lung hi ni khatah vawi 1,00,000 (nuai khat) vel a phu.
10. Maimitchhing chungin a hahchhiau theih loh.
11. Ṭawng chhuak tur hian thahrui chi hrang hrang 72 an thawh ho a ngai.
12. Naupang hi nipuiah an ṭhang chak ber.

13. Ni khatah vawi 20,000 vel mit kan khap thin a. Hmeichhiaten mipate aiin a lêtin mit an khap rang zawk.

14. Hnar hian rim chi hrang 50,000 a thliar hrang thei.

15. Ni khatah thisen gallon 400 velin kan kal hi a kaltlang thin.

16. Kan mit hi kan pian tirha mi bak a thang lo va; kan hnar leh bengte erawh chu dam chhungin chawl lovin a thang zel.

17. Hrawk bâwk hi *Adam's Apple* tia hriat lar zawk a ni.

18. Kutzungtang sei lam hian kuttin than danah awmzia a lo nei hle mai a. Kutzunglai tin hi a thang chak ber a. Chawhrualin kutzungtang tin hi kutzungpui tin lêtin a thang chak zawk.

19. Kuttin hi a bul atanga tin hmawr thlenga thang turin thla ruk vel a ngai.

20. Kan thisen zâm hi mel 62,000 vela sei a ni.

21. Mihring thluakah hian hriatna thazam cell tluklehdingawn za vel a awm.

22. Sam tiṭhangtu leh zungtang tiṭhangtu hi a substance (ziarang) a inang chiah.

23. Thluakin thahrui a hman hi bulb watt 25 tieng thei tâwk vel a ni.

24. Lung hian thisen cm 900 tichik thei khawp chakna a pe chhuak.

25. Kan thluak hian darkar khatah km 375-a chakin thu a thawn thin.

26. Ni 3/4 danah pumpui tichhahtu thar kan nei ziah a. Nei lo ila chuan, kan pumpuiin chaw pai tawih nana a hman acid chak tak hian kan pumpui pawh a chiah zawp vek ang.


27. Ke pahnihah hian thlan tuihnang (Sweat glands) nuai nga zet a awm.

[illegible]

AACHUK: 2. Tuhutute tuihi dik
leh dik loh chikute khua (Tih 17)
(5); 4. Inthawia an (4); 5.
LAPLA ta (Sam 22) (3); 6. Isau
torelaktu (6); 7. Isarel-telmalna (9);
8. A. 10. uken khushkhunmah Josefa
an (5); 12. Lo inhawng rawh,
13. Hagan naa a paisa
q a en ban (6); 15. Novola gwang
ninhghahns bang (6); 17. Patsirina
han a siama huna (Gen 2) (4);
18. Judat-inkhawm (3).

CROSSWORD NO. 1 DIKNA												
	A	M	A	B	A		A	I	N	I		R
B				U		R		A				
I	I	Z	R	A	P	U		U		H		K
	L			S		A		T				
	A	I	D	I	N	I	H	E	L			P
	M											A
	A	B	A	H	A		A	I		H		C
			B		D		S			H		
A	B	B	A	B	A	R	A	S	U	S	A	H
			N		R		E					I
A	I	N	A	I	K		A	R	I	D	R	A

MAWILEH NALHITIH DAN BERKHAN CHEIRAWHLE



CHEI CHHUAH




Mawimawii chuan a tichhin ngai lo...!




Chei dan tur

D = Dum, H = Hring, E = Eng



Bible Milem : EZEKIELA




Bible Milem : **EZEKIELA**

Bible Milem : **EZEKIELA**

Bible Milem : **EZEKIELA****AWM ZEL TUR**

KA HMUH ANG HMU THEI RAWH



A chung a lemziak chi hnih khi ngun takin en la, a inan lohna chi ruk hmu thei rawh.

A hnuaiah hian a chhanna lo ziaak la

- 1.....
- 2
- 3.....
- 4.....
- 5.....
- 6.....

A chhanna chu thla lehah kan rawn chhuah ang.

To,



Ramthar Veng Naupang Chawhnu Inkhawm leh YFC zirtirtu te
(Kristian Naupang Chanchinbu la tam ber Kohhran)



Published by Rev. K. Lalpiangthara,
Synod Literature & Publication Board, Aizawl and
Printed at the Synod Press, Mission Veng, Aizawl - 796 001.

Copies - 23,000